


LITERATURA. Bilboko poeta jaio zeneko urteurrena poesia errezitaldi batekin ospatu zuten, atzo



INIGO AZKONA

Gabriel Aresti: pertsona gogoan eta haren poesia bihotzean

Aresti zale ugari bildu ziren atzo Bilboko Bidebarrieta liburutegira, poetaren omenez antolatu zen poesia errezitaldia entzutera. Aresti hil zenetik 26 urte bete ziren igandean, baina astelehena egun hobea izango zelakoan, azken urteetan poetaren izenean antolatzen duen saioa atzeratzea erabaki

zuen Udalak. Batek daki igandean egin izanez gero zelako arrakasta lortuko zuen, baina atzokoa ikusteko aukera eduki izan balu, Aresti bera harro egongo zen. Azken uneko gertaera bat zela medio, poetaren alargun Meli Estebanek ezin izan zuen errezitaldiko lehen poema irakurri. Dena den,

Arestiren senideak bertan izan ziren. Bilboaren poemei ondoko hauek jarri zieten ahotso: Andolin Eguskitzak, Felipe Juaristik, Joxe Mari Iturraldek, Juan Ramon Madariagak, eta Igor Estankonak. Saioa Libitum jazz hirukotearen musikak girotu zuen.

BERTSOLARITZA. Baztandarrak egindako lana gogora ekarri nahi du Bertsozale Elkartek

Egañarekin hasiko da Mariano Izeta zenaren omenezko Bertsoaroa, gaur

Hitzaldi bat, saioak eta emanaldi bereziak antolatu dituzte aurten, hamaikagarren aldian

Edurne Elizondo | **IRUÑEA**

Mariano Izeta zenaren omenez antolatu du Bertsoaroa aurten Nafarroako Bertsozale Elkartek, Iruñeko Udalaren laguntzaz. Bertsolaritzaren eta euskalgin-tzaren esparruan Izetak egindako lana gogora ekarri nahi izan du prestatutako egitarauaren

bidez Bertsozale Elkartek. Erakunde horretako ohorezko presidente zen, gainera, Mariano Izeta.

Bertsoaroa Andoni Egañarekin hasiko da, gaur, Iruñeko Erraldoien Txokoan. Bertsolaria bertsolaritzaren oraina eta geroa aztertuko ditu emanen duen hitzaldian.

Hilaren 18an, berriz, bertso-lari gazteek hartuko dute lekukoa, eta saioa egingo dute, Jon Abril gaijartzaileak lagunduta. Zehazki, Amets Arzallus, Sus-trai Kolina, Estitxu Arozena, Xabier Silveira, Iñigo Olaetxea eta Bittor Elizagoienek parte hartuko dute.

Hilaren 25ekoa izanen da Mariano Izetaren omenez antolaturiko Bertsoaroko ekitaldi nagusia. Baztandarraren omenez jarritako bertso idatziak kantatuko dituzte Mikel Alzuart, Unai Iturriaga, Igor Elortza eta Jon Sarasuak. Kike Diez de Ultzurrun Euskalerria Irrati-ko esataria izanen da saioko aurkezlea.

Bertso zaharrak eta olerkiak

Azken urteetan bezala, ohiko bertso saioez gain, beste hainbat emanaldi berezi prestatu ditu Bertsozale Elkartek aurten ere. Batetik, XX. mendeko

bertso zaharrei buruzko saioa egingen dute; Xabier Amurizak berak prestatutako antologia-
ren berri emanen du Iruñean, hilaren 30ean, Jon Maiarekin batera.

Bestetik, XX. mendeko olerkigintzari buruzko saioan, azaroaren 6an, Jose Luis Otamendik berak prestatutako antologia irakurri eta kantatua aurkeztuko du, Iñigo Aranbarriaren laguntzaz.

Azaroaren 8an, bukatzeko, ohiko bertso saioa antolatu du Bertsozale Elkartek egun horretarako: Jexux Mari Irazu, Maialen Lujanbio, Ekintza Landa, Iñigo Ibarra, Peñagarikano eta Oskar Estangak parte hartuko dute, eta gaijartzaile lane-tan Nerea Bruño ariko da.

Gaurko hitzaldia izan ezik, beste saioak Gurutzeko Plaza-ko Institutuen areto nagusian izanen dira, arratsaldeko 20:00etan.

LITERATURA

Frankfurteko liburu azokan %14 jaitsi da ikusleen kopurua

Erredakzioa | **DONOSTIA**

Antolatzaileek adierazi dutenez, Nazioarteko liburu azokako ikusleen kopurua %14 jaitsi da aurtengo azokan; guztira, 270.000 lagun bertaratu dira.

Atzo itxi zituen Frankfurteko azokak ateak. Aurtengo herrialde gonbidatua Grezia izan den arren, munduko gatazkak sorturiko klima ezkorrak itzal handia egin dio herrialde honi. Ziklo ekonomikoaren gorabeherak ere izan dute zerikusirik.

Zenbait argitaletxe amerikarrek, asiarrek eta ingelesek hutsik utzi dituzte euren mahaiak, erasoren bat gerta zitekeen beldur baitziren.

Aipagarria diren obra handien orde, aurtengo azokan, erlijio gaiei buruzko liburuak, fundamentalismo islamikoaren ingurukoak eta Osama Bin Ladenen zenbait biografia izan dira protagonista nagusiak.

Bertaratutako ikusleen eta gonbidaturiko argitaletxeen kopurua murrizteaz gain, bertan eskaini diren hitzalditan ere izan du eraginik munduko gatazkak; hala, Jürgen Habermas filosofoak, Bakearen saria jaso zuenak, islamikoekiko elkar-
rizzeta aldarrikatu zuen bere hitzaldian.

Euskal editoreek, emaitza onak

Ikusle gutxiago izan direla nabaritu duten arren, gus-tura egingo dute itzulera Euskal Editoreen Elkarteko kideek. Joan aurretik espero zutena lortu baitute bertan, hots, euskal ordezkaritza egonkortzea.

Aurreko urteetan egindako lana kulturalki eta komertzialki finkatzen ari da Frankfurt. Aurretik hitzarturiko ekintza guztietan hartu dute parte euskaldunek, eta zenbait libururen eskubideen erosketak lotuta etorriko dira.

Euskal editoreentzako hurrengo zita nagusia Guadalajarako nazioarteko liburu azoka izango da, Mexikon. Azaroaren amaieran egingo da azoka hori.

Egunkariarekin **ZINEMARA**

**250 pta-ko
DESKONTUA**



**WARNER
LUSOMUNDO
SOGECABLE
ZINEMAK**



Entregatu kupoi hau WARNER LUSOMUNDO zineman.
Astelehenetik ostiralera 250 pta-ko deskontua zine sarreretan.